



SAVANETA DEN ARUBA SU ANTANO SU SCHOOL

Ora Shon Piet Croes---cu su barba blanco---a ser nombra na 1903 y a habri school, e tabatin 50 anja. No tabata su prome biaha na Savaneta, pasobra na 1893 e tabata duna les caba akinan. Prome-aya Herry Croes tabata haci school. El a muri 1888 y school a keda bashi pa cinco anja. Nos no sa cuanto anja Shon Piet a keda den su periodo prome na Savaneta, ma sigur ta cu na 1900 no tabatin school. Na 1903 Shon Piet ta cuminsa atrobe "cu hopi zelo y poco mucha". Shon Bechi tabata traha cuminda p'e. E school tabata situa banda di misa, y a ser usa despues como school di sombre, magasin y garashi. Na mei 1908 pastoor Potten a haya noticia di Mgr. van Baars, cu e por cuminsa traha un school, pasobra soeurnan lo bini pronto. Atrobe henter pueblo y tur muchanan ta duna duna cooperacion, nan a trece piedranan y tur otro materialnan. Mesla di Noord a traha school di soeurnan. Ora soeurnan a yega na januari 1909 tur hende tabata presenta pa duna nan un bonbini real. E di promenan tabata Soeur Pharailda y Soeur Edwine. Nan tabata bisti panja preto. Na anja 1916 Soeurnan di panja blanco ta tuma nan lugar. Esey ta den tempo di pastoor Ellis. Nos ta lesa nombrenan di Soeur Emiliana y Soeur Dosithea. Nan a traha un lokaal y mei acerca, asina cu school a haya cuatro local.

Mientras tanto e di prome juffrouwman tabata traha na school caba. Mosa Koolman (despues casa cu Juan La-) a bai school di Shon Piet. Despues el a bai school di Santa Cruz na 1908 pa 5e klas. Ora soeurnan a bini Savaneta, el a bai 6e klas aki. Soeurnan a haya den dje un bon alumno y a pidi'e pa sigi studia, pa por yuda soeurnan na school. Hunto cu Maria Thijsen (despues Soeur Vicentia La Corsow) Mosa a haya instruccion di soeurnan mes, durante un anja y mei, tur mainta despues di misa, atardi despues di school y henter diasabra y diadomingo. Soeurnan a usa tur nan tempo liber anto pa instrui nan cooperadornan futuro. Nan no a studia e asintonan mucho profundo, pasobra ora Maria y Mosa tabatin algo cu nan no ta comprende, soeurnan a bisa. "Pero asina cos ta, asina boso mester sinja muchanan".

Despues di un anja y mei nan mester a haci examen. Sa ta conta, cu pastoor Potten a hiba nan den su kitrin, y cu esey tabata di prome biaha cu Mosa a bini Playa. Piet van Leeuwen tabata inspector di ensenjanza y a tuma e examen. Mosa a duna les den 1e klas for di 1911 te na 1921. Hopi mucha no tabata bai school. Un ta bisa. "Mi no a bai school nunca, pasobra mi tabata sufri wowo, y despues ora m'a bira mas grandi, mi no por a sinja mas". Un otro: "Mi tabata malo, ta pesey mi no a bai school. Pero ora e muchanan a bini for di school, mi a puntra nan kiko nan a sinja. Nan a contami tur cos. Mi tabatin masha bon memoria, asina ta cu mi no a keda atras pasobra nan no sa nada mas cu mi. School di antes no tabata manera awor. Loke un mucha di cinco anja sa awe, nos no tabata sa na 10 anja di edad".